

Siunnersuummut nassuiaatit

## Nassuiaatit nalinginnaasut

### 1. Aallarniut

Inuussutissarsiutigalugu aalisartut, inuussutissarsiutigalugu piniartut inuussutissarsiutigalugu nunalerinermik ingerlataqartut aallarteqqinnissamut tapiiffigineqartarnerat pillugu inatsisartut inatsisaata (aallarteqqinnissamut tapiiffigineqarnissaq pillugu inatsit) allanngortinnissaanut siunnersuummi siunertaavoq aalisartut, inuussutissarsiutigalugu piniartut inuussutissarsiutigalugu nunalerinermik ingerlataqartut aallarteqqinnissamut tapiiffigineqartarnerinut periarfissat pitsaanerulersinnissaat. Tamanna sivikitsumik ilimasaarneqarlutik silap pissusaata allanngorneranik peqquteqartumik pissutsit tunngavigalugit isertitat tamakkerlugit imaluunniit taakku ilaanik annertuunik annaasaqartunut inatsimmut ilaatinneqartunut inunnut aningaasatigut tapiiffigineqarsinnaasunut naammattumik inatsisitigut tunngavimmik pilersitsinikkut pissaq.

Tamatuma saniatigut ajoquserneq, annaasaqarneq, napparsimaneq sulisinnaajunnaarnerluunniit matussuserneqarsimatillugu imaluunniit nammineerluni imaluunniit pisortani tapiissutit assigisaalluunniit aqutugalugit matussuserneqarsimatillugu aallarteqqinnissamut tapiissutissanik Naalakkersuisut tunniussinissaannut akornusiisut aallarteqqinnissamut tapiissuteqarnissamut aporfiit siunertarineqanngitsut peerneqarnissaannik siunnersuut siunertaqarpoq.

### 2. Siunnersuummi immikkoortut pingaarnerit

*2.1. Aallarteqqinnissamut tapiissutisinissamut periarfissap ajornannginnerulenera*  
Inuussutissarsiutigalugu aalisartut, inuussutissarsiutigalugu piniartut inuussutissarsiutigalugu nunalerinermik ingerlataqartut aallarteqqinnissamut tapiiffigineqartarnerat pillugu inatsisartut inatsisaata (aallarteqqinnissamut tapiiffigineqarnissaq pillugu inatsit) manna tikillugu atuuttoq ajoquserneq inatsimmut ilaasoq nammineerluni imaluunniit pisortani tapiissutit assigisaalluunniit aqutugalugit matussuserneqarsimappat assut atoruminaassimavoq. Aallarteqqinnissamut tapiiffigineqarnissaq pillugu inatsimmi oqaasertaliussat manna tikillugu atuuttut kingunerisimavaat pisuni ikitsuararsuarni inatsit piviusumik taamaallaat atuussinnaasimanera.

Inatsisip allanngortinneratigut siunnersuummi § 1, imm. 1-imi pisut taaneqartut matussuserneqarsimappata imaluunniit nammineerluni imaluunniit pisortat

sillimmasiinerannit matussuserneqarsimappata aallarteqqinnissamut tapiissutisisoqarsinnaannginnera aalajangiussimaneqarpoq. Taamaattorli nammineerluni pisortallu tapiissutisisarnerannut innersuussineq peerneqarluni. Tamatuma kingunerisaanik inuk inatsisip aalajangersagaanut ilaasoq aallarteqqinnissamut tapiiffigineqarsinnaalluni pineqartoq inuussutissarsiummut attuumassuteqartumik annaasaqarsimappat, naak pineqartoq nammineerluni imaluunniit pisortaniit tapiissutisinikkut tapiissutisisimagaluartoq - assersuutigalugu pisortanit pilersugaanikkut.

Siunnersuummi § 1-imut ilaasut pisut nammineerluni pisortaniluunniit sillimmasiineranut matussuserneqarsinnaagaluartut peqatigisaanik aallarteqqinnissamut tapiiffigitinnissamut periarfissamik ikkussisoqarpoq, pineqartoq inatsimmi aningaasat amerlassusaannut killiliussamit ikinnerusunik isertitaqarpat periarfissaasumik.

Aallarteqqinnissamut tapiiffigitinneq suli inuussutissarsiornikkut annaasaqarnermik uppersarneqarsinnaasuni pisuni taamaallaat atorneqarsinnaavoq.

#### *2.2. Qinnuteqarnissamut piffissaliussaq inatsisinik tunngaveqartoq*

Pisuni ajutoornerup malitsigisaanik ingerlataqartoq inuussutissarsiornermut attuumasunik atortunik annaasaqartillugu imaluunniit atortut ajoqusernerinik misigisaqarpat aallarteqqinnissamut tapiiffigineqarnissaq pillugu inatsimmi siunertaq tassaavoq ingerlataqartup piaarnerpaamik inuussutissarsiumminik aallarteqqissinnaanissaa. Siunnersuutikkut qinnuteqarnissamut piffissaliussamik ikkussisoqarpoq taamaalilluni ingerlataqartoq ajoqusernermit imaluunniit tammartoqarneraniit kingusinnerpaamik ullut 30-it qaangiutsinnagit qinnuteqarsinnaalluni.

#### *2.3 Aallarteqqinnissamut tapiiffigitissinnaaneq 25.000 kr.-niit 50.000 kr.-nut qaffanneqarpoq.*

Allaffissornikkut tapiiffigitissinnaanermut sinaakkutit qaffannissaat siunnersuutigineqarpoq taamaalilluni aningaasat tapiissutaasut inuussutissarsiornermi atortut akiisa ineriartornerinut naapertuutilerlutik. Allaffissornikkut oqartussat aallarteqqinnissamut tapiiffigitinnissamut periarfissap 2.000 kr.-niit 50.000 kr.-nut qaffanneqarnissaa siunnersuutigineqarpoq.

#### *2.4. Tapiiffigiteqqittarnerit killilernerit*

Ukiut pingasukkaarlugit inuussutissarsiornermut attuumassuteqartut atortut assinginut tammarninullu aallarteqqinnissamut qinnuteqartut tapiiffigitinnissaat pillugu siunnersuutikkut killiliisoqarpoq. Ukiup tulliani atortup assinganut imaluunniit tammarnernut aallarteqqinnissamut tapiiffigitinnissamut periarfissami taamaalilluni aaqquussinermit killiliisoqarpoq. Killiliineq eqqunneqarpoq, tassa qassutit aalisarnermilu atortut allat tammarneri pillugit qinnuteqarsimasunit taakkunanga aallarteqqinnissamut tapiiffigineqarnissaq pillugu qinnuteqaatit assinginik ukiut tamaasa tiguisoqartarmat.

### **3. Pisortanut aningaasaqarnikkut allaffissornikkullu kingunerisassat**

Siunnersuummiipput allannguutit pisortat atuinerunerannik kinguneqarumaartut. Allannguutit kingunerisaannik inuussutissarsiuqartut aallarteqqinnissamut tapiiffigineqarnissaq pillugu qinnuteqarsinnaanerisa ajornannginnerulerneranik kinguneqassaaq, allaffissornikkullu 50.000 kr. tikillugit tapiissutit atugassanngortinneqarsinnaallutik. Inatsisip atuuffia allanngortinneqanngilaq, ingerlataqartullu tapiissutisisinnaaneranut inuussutissarsiummut tunngasunik annaasaqarneq sulii pineqarluni. Taamaattorli allaffissornikkut amerlanerusunik tapiissutisisinnaanermut ilaliullugu aallarteqqinnissamut tapiissutisinerup ajornannginnerulerneranik pisortat 1,2-1,5 mio. kr.-inik amerlanerusunik aningaasartuuteqarnerannik kinguneqassasoq ilimagineqarpoq. Aningaasanut inatsimmi konto pingaarnermi aningaasartuuteqarneruneq maannakkut akuersissutigineqareersut 3. mio. kr. iluani aningaasalersorneqarsinnaassasoq naatsorsuutigineqarpoq.

Siunnersuutikkut tapiissutaasartut qaffassinnaassapput, allatigullu pissutsit allanngorsimangippata pisortani aningaasat siunertanut allanut atorineqartarneri nuutsinneqassallutik.

### **4. Inuussutissarsiortunut aningaasaqarnikkut allaffissornikkullu kingunerisassat**

Annaasanut siusinnerusukkat ajornartinneqarsimasunut aallarteqqinnissamut tapiissutisinnissamut periarfissat ilaatigut ajornannginnerulersillugit inuussutissarsiortunut suliniutit pitsaasut eqqunneqarnerinik siunnersuummi suliniut eqqunneqarpoq, tassa annaasat taakku nammineerluni imaluunniit pisortani tapiissutisarnikkut matussuserneqartarmata.

Siunnersuut aamma inuussutissarsiortunut ajortumik kinguneqartussanik suliniutinik eqqussivoq. Atortut ajoqusernerinut tammannerinulluunniit qanoq akulikitsigisumik tapiissutinik qinnuteqaqqissinnaanermut piffissatigut killiliinikkut tamanna eqqunneqarpoq. Inuussutissarsiortunut ataasiakkaanut nalinginnaasumik ingerlaavartumik naammassisaqarsinnaanikkut aqqissugaanikkullu ineriartornermut tatisimanninneq ilaatigut siunnersuutip annikillisissavaa, pisuni nalinginnaasuni ataasiakkaat ingerlallualernerinik iluaqutaasusaaq taamaalillunilu inuussutissarsiummi isertitaqarnerulersitsilluni.

### **5. Avatangiisinut, pinngortitamut inuillu peqqissusaannut kingunerisassat**

Siunnersuut avatangiisinut, pinngortitamut imaluunniit inuit peqqissusiannut sunniuteqassasoq naatsorsuutigineqanngilaq.

### **6. Innuttaasunut kingunerisassat**

Siunnersuut innuttaasunut sunniuteqassanngatinneqanngilaq.

## **7. Kingunerisassat pingaarnerit allat**

Siunnersuutip annertunerusunik kinguneqarnissaa naatsorsuutigineqanngilaq.

## **8. Pisortanik aamma kattuffinnik il.il. tusarniaaneq**

Siunnersuut piffissami 6. juni 2024-miit 5. juli 2024-mut tusarniaassutigineqarsimavoq.

## **Siunnersuummi aalajangersakkanut ataasiakkaanut nassuiaatit**

### *§ 1-imut*

Nr. 1-imut (§ 1)

### *§ 1-imut*

Imm. 1-imut.

Inatsisartut inatsisaat Kalaallit Nunaanni inuussutissarsiuteqartunut inuussutissarsiutigalugu aalisartunut, inuussutissarsiutigalugu piniartunut inuussutissarsiutigalugulu nunalerinermik ingerlataqartunut atorneqarpoq.

Inatsisartut inatsisaanni siunertarineqarpoq qinnuteqaateqartoq maannamut inuussutissarsiutigisimasaminik ingerlatitseqqittuartungussasoq taamalu pisortanit ikiorsiissutinik assigisaannillu qinnuteqartoq ikiorserneqarnani.

Aningaasat ikiorsiissutitut/tapiissutitut qinnutigineqartorpiaat tunniunneqarnerata kingunerissavaa, qinnuteqaateqartup inuussutissarsiumminik ingerlatitseqqissinnaanera. Inatsisartut inatsisissaanni annaasanut matussuserneqarsinnaanngitsunut imaluunniit nammineerluni imaluunniit pisortatigut sillimmasiinernit matussuserneqarsinnaanngitsunut tapiissutisinnissamut periarfissatut eqqarsaataavoq, takuuk §2.

Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlatsisut pillugit nassuiaammi taaguutit taakku nalinginnaasumik nassuiaataannut sukkulluunniit atuuttumut innersuussisoqarpoq.

Aalajangersagaq malillugu 1) atortut ajoqusernerini, 2) inuussutissarsiummut tunngasut atortut tammarnerni, 3) ilungersunartumik napparsimanermi allatigulluunniit timikkut peqquteqartumik sulisinnaajunaarnermi imaluunniit 4) inuussutissarsiutikkut annaasaqarneq pillugu aallarteqqinnissamut tapiiffigineqarnissamut qinnuteqartoqarsinnaavoq.

Tassani tunngavigineqarpoq § 1, imm. 1-ip oqaasertai malillugit sukangasuumik nassuiarneqarnissaa.

Inatsit aamma annaasaqarsinnaanermut pisunut inissaqartitsivoq. Tassani paasineqarput pisut suli pisimannngitsunut annaasaqarsinnaanernit. Aalajangersakkap atorneqarsinnaaneranut assersuutissaqqissoq tassaavoq piffissat qimmit qimuttut nerukkaatissaannik naammattumik isumalluuteqarfiunngitsut. Qimmit nerukkaatissaqanngippata atorneqarsinnaajunnaassapput,

taamaalilluni aalajangersagaq pitsaaliuinertut suliniutaavoq, pineqartoq tapiissutinik pissarsinngippat inuk inuussutissarsiornermut tunngasuni annaasaqassalluni taannalu piviusumik annaasaqarsimappat aallarteqqinnissamut tapiissutisisinnaassalluni.

Atortut "inuussutissarsiornermut tunngasuunerannut" aalajangiisussaavoq inuussutissarsiutip ingerlannissaanut atanersut pisariaqarnersullu.

Nr. 1)

Aalajangersakkamut ilaapput pisut atortuni illunilu kiisalu pigisani ajoqusertoqarnera assersuutigalugu illumi, umiatsiami motorimilu ajoquserneq.

Ajoqusernermut uppersarsaatit assersuutigalugu assitigut uppersarsaatit pisimasullu allaaserineqarnera, takunnittup oqaaseqarnerata assilineqarnera, nalunaarutiginninnerup uppersarsaataa il.il. nassiunneqarsinnaapput.

Uppersarsaanissamut piumasaqaatit pillugit malittarisassanik erseqqinnerusunik Naalakkersuisut aalajangersaasinnaapput, tak. § 1, imm. 3, tassunga ilanngullugu ilumoorluinnarnermik nalunaarutip atsiorneqarsimanissaa pillugu piumasaqaammik aalajangersaaneq.

Nr. 2)

Aalajangersagaq amerlanertigut qassutinik annaasaqarnermut atorineqartarpoq, taakkununnigali killeqartinneqarnani. Aalajangersagaq taanna malillugu piumasaqaataavoq tammartut uppersarsarneqarnissaat taamaattumillu naammattumik uppersarsateqanngippat aallarteqqinnissamut tapiissutinik killeqanngitsumik qinnuteqartoqarsinnaanani. Qassutit tammarnerni uppersarsaat assersuutigalugu tassaasinnaavoq oqartussanut attuumassuteqartunut nalunaarutigineri imaluunniit politiinut nalunaarutigineri. Aalisarnermut atortut annaasat qimatallu pillugit nalunaaruteqarnissamut uppersarsaasersuinissamullu maleruagassat pillugit periutsit allat Piujuartitsineq siunertaralugu aalisarnerup teknikikkut iluarsartuussivigineqarnera pillugu Namminersorlutik Oqartussat nalunaarutaanni nassuiarneqarput. Uppersarsaat qinnuteqaammut ilanngunneqassaaq.

Assersuutigalugu tunitsivimmiit atortunik nutaanik ingerlataqartoq pissarsisimappat pineqartoq peqatigisaanik Naalakkersuisuniit aallarteqqinnissamut tapiissutisisinnaanngilaq. Nalaakkersuisoqarfik akisussaasoq suliamik suliarinninnermut atatillugu paasissutissanik naammattunik pissarsisarnissamut tunngavik naapertorlugu tunitsivinniit attuumassuteqartuniit paasissutissanik pissarsiniarsinnaavoq. Peqataasumik tusarniaanissaq pillugu ingerlatsineri inatsisini malittarisassat soorunami isiginiarneqassapput.

Nr. 3)

Aalajangersakkami aalajangersarneqarpoq nappaammik allatigulluunniit timi atorlugu sulisinnaajunnaarnermik peqquteqartumik inuussutissarsiornikkut annaasaqarneq pillugu aallarteqqinnissamut tapiissutinik ingerlataqartoq qinnuteqarsinnaasoq.

Tassani paasineqassaaq ingerlataqartoq assersuutigalugu sulisinnaajunnaarnek pissutigalugu piffissami napparsimanerata nalaani annaasimasaanut imaluunniit aserorsimasimasunut atortunik nutaanik pisinissamut tapiissutinik qinnuteqarsinnaasoq.

Aalajangersagaq taamaalilluni inuussutissarsiutip aallarteqqinnissaanut attuumassuteqanngitsumik aamma aallarteqqinnissamut tapiissutit pillugit inatsisip atuuffiata avataaniittunut sulinermi iluanaarutininik annaasat allatigulluunniit aningaasatigut taarsiissutissat pillugit aallarteqqinnissamut tapiissutisisoqarnissaanut periarfissiinngilaq.

Napparsimanerup qanoq paasineqarnissaanut apeqqutaavoq nakorsat napparsimaneq qanoq paasisarneraat. Inuup sulisinnaajunnaarsimaneera aalajangiisuvoq. Taamaattumik tapiissutinik qinnuteqaateqarnermi nakorsap uppersaataa ilanngunneqassaaq. Piumasarineqanngilaq napparsimanerup qanoq sivilutiginera ilanngunneqassasoq. Pingaarnerusooq tassaavoq napparsimanerup nalaani inuussutissarsiummut tunngatillugu annaasaqarsimaneq napparsimanerup kingunerisaanik inuutissarsiummut uteqqinnissamut ajornarnerulersitsisoq. Assersuut ataaseq tassaavoq piffissaq napparsimaffiusooq napparsimaneq pissutigalugu aserfallatsaaliuisimannginneq pissutigalugu inuussutissarsiummut tunngasunik atortut ajoquserneri imaluunniit napparsimaneq pissutigalugu aaneqarsinnaanngitsut qassutit aserorneri/annaaneqarneri.

Nr. 4)

Aalajangersagaq tassaavoq aalajangersakkanik katersiffiusooq, oqaasertaata nassuiarnerani imm. 1, nr. 1-3-mut ilaanngitsut malillugit pisunut inissaqartitsinissaq, kisiannili pisunut tapiissuteqarfiusinnaasunut eqqaanartut pisimallutik. Aalajangersakkami tassani pingaarnerutillugit sammineqarput pisut assigiinngitsunut tamanut tunnganeruset. Tassa imaappooq pisut inuit ataasiakkaat kisiisa eqqornagit inuiaqatigiit ilaanut amerlanernut eqquisut. Aalajangersagaq pisuni immikkorluinnaq pisuni atorneqarsinnaavoq qaqutigoortuusutullu pissuseqartariaqarluni. Taamaattumik pisariaqarluinnarluni aalajangersagaq taanna malillugu aallarteqqinnissamut tapiissutisinermut atatillugu inuussutissarsiornikkut akornutit assigisaaluunniit pillugit erseqqissunik kinaassusersiunngitsunillu piumasaqaateqarnissaq.

Pisut taakku tassaasinnaapput orsussap akiisa nalinginnaasuunngitsumik qaffanneri assigisaaluunniit, taakkununnigali killeqartinneqarnatik. Aalajangersagaq aamma pisuni qimminut qimuttunut nerukkaatissat naammakkunnaarnerini imaluunniit qimminut nerukkaatissat akiisa nalinginnaasuunngitsumik qaffannerini imaluunniit qimmit qimuttut akuttunngitsumik nerukkaatissaannut innuttaasut naammattumik akissaqarnissaannik akornusiisuni atorneqarsinnaavoq.

Aalajangersagaq taanna innersuussutigalugu aallarteqqinnissamut tapiiffigineqarnermi soqutigisaqaqatigiinni kattuffik attuumassuteqartoq tusarniaaffigineqassaaq, tak. § 3, imm. 4.

Imm. 2-mut.

Pisut ajunaarnersuartut ittut sakkortuut tassaapput pisut tassanngaannartut siumullu naatsorsuutigineqarsinnaanngitsut, taamatullu annikigisassaannngitsut najukkamilu innuttaasut oqartussaasullu ulluinnarni isumalluutitut pissarsiarisartagaannut sunniteqartumik ajutoorfiusimasut. Aallaaviatigut ingerlatsisoq ataasiinnaq pisumit sunnertissimaguni pisoq tassaasimassanngilaq ajunaarnersuartut ittoq tassanngaannartumik pisimasoq.

Aalajangersagaq malillugu assersuutigalugu tapiissutit nunalerisumut tunniunneqarsinnaassapput nunalerisup naatsiaatai, uumasupilunniit kissakkiartorneratigut Kalaallit Nunaannukarsimasunit, siornatigullu ilisimaneqanngitsunit nalinginnaasuniilluunniit aserorterneqarsimappata. Aammattaaq sikoqarpiannginna imaluunniit sikoqarpallaarnera pissutigalugu inuussutissarsiummik ingerlatsisinnaanngitsunut aalisartunut imaluunniit piniartunut piniakkani nappaateqartoqarnera assersuutigalugu Chronic Wasting Disease (CWD) pisassat malunnartumik ikilinerini tapiissuteqartoqarsinnaavoq.

Aalajangersagaq taanna malillugu tapiissutit aalajangersimasumik ataasiakkaanit qinnuteqartoqarneratigut aamma soqutigisaqaqatigiit kattuffiit attuumassuteqartunik tusarniaanerup kingorna tapiisoqarsinnaavoq, tak. § 3, imm. 4.

Imm. 3-mut

Imm. 1-2-mi pisunut uppernarsaanissamut piumasaqaatit pillugit malittarisassanik nalunaarut aqutugalugu erseqqinnerusunik aalajangersaanissamut Naalakkersuisut piginnaatinneqarput. Tassunga ilanngullugu annaasaq pillugu uppernarsaanissamut piumasaqaatit pillugit malittarisassat kiisalu pineqartup aallarteqqinnissamut tapiiffigineqarnissaq pillugu qinnutigineqartunik pigisanik pineqartup pisisimanageranik peqarsimanageranillu uppernarsaanissamut piumasaqaatit pillugit malittarisassanik atulersitsisoqarsinnaavoq.

Nr. 2-mut (§ 2)

## § 2-mut

Imm. 1-imut

Oqaaseq "matusineq" imatut paasineqassaaq pisoq patsisigalugu aningaasanik tunniussineq. § 2, imm. 1 naapertorlugu aamma pisoq pisortanit nammineerluniluunniit sillimaserneqarsinnaassanngilaq.

Tapiissutit sillimasiisarfinnut unammilleqatigiinnermik equngalersitsisutut sunniteqaqqusaanngillat, tak. Unammilleqatigiinneq pillugu Inatsisartut inatsisaat nr. 1, 15.



maj 2014-meersoq, (Unammilleqatigiinneq pillugu inatsit). Tamanna imatut paasineqassaaq aallarteqqinnissamut tapiissutit namminersortut sillimmaseeriaasiinut aalajangersimasunut taartaasussatut issanngitsut.

Suulluunniit sillimmasersinnaanerinit apeqqutaavoq nammineerluni imaluunniit pisortat sillimmasiinerisigut annaasaq sillimmaserneqarsinnaanersoq. Innuttaasunut inuussutissarsiummut pineqartumut atasumik nalinginnaasut aallaavigalugit sillimmatinik nalinginnaasutut isigisariaqartunik pisinermikkut annaasaqarnerminnik pinngitsoortitsisimasinnaagaluartunik taamaaliorisimannngitsunulli tapiissuteqartoqarsinnaassanngilaq. Aalisartuq assersuutigalugu angallammi inuussutissarsiummi umiatsiaaqqamiluunniit motori sillimmaserneqarsimanngippat pineqartuq taamaaliorisimanngippat aallarteqqinnissamut tapiissutisinnisaq ajornassaaq. Aalajangersagaq taanna malillugu aallarteqqinnissamut tapiissutit taamaalillutik qaqutigoortutut iluseqassapput pisunilu sillimmaserneqarsimannngitsuni taamaallaat atornerarsinnaalluni, assersuutigalugu qassutit tammarnerni.

Taamaattorli inuk inatsimmut ilaasoq, kisiannili sillimmasiinissamut aningaasaqarnikkut pisinnaasimannngitsuq, piumasaaqammut tassunga ilaatinneqassanngilaq, tak. imm. 2.

"Pisortat sillimmasiinerini" pingaartumik pineqarput Kalaallit Nunaanni sulinermi ajoqusernermut sillimmasiineq pillugu inatsit pillugu nalunaarut aqqissuussinerillu assingusut malillugit tunniunneqartut.

"Nammineerluni sillimmasiineq" tassaavoq nammineerluni sillimmasiinermik neqeroortuniit assigisaannilluunniit sillimmasiinerikkut sullinneqarnerit.

Imm. 2-mut

Aalajangersagaq tassaavoq sillimmasiinissaq pillugu piumasaaqammut ilaannngitsuq, tak. imm. 1, aamma ajoqusernermut sillimmasiinermik matussuserneqarsinnaasumut aallarteqqinnissamut tapiissutisinnissamut qinnuteqartumut periarfissiisoq, sillimmasernissamullu akiliutip appasissumik isertitaqarnermut sanilliullugu qaffasippallaarnera pissutigalugu qinnuteqartumut periarfissaasimannngitsuq.

Aalajangersagaq taanna malillugu aallarteqqinnissamut tapiissutisineq aalajangersimasumik missiliunikkut pissaaq, qinnuteqartorlu inuussutissarsiummi sillimmasiinissamut nammineq pisariaqartunik aningaasaateqarsimanngippat akilerneqarsinnaalluni.

Aalajangersakkami piumasaaqatit marluk uku naammassineqassapput:

- 1) inuussutissarsiutigalugu aalisartooq, inuussutissarsiutigalugu piniartooq imaluunniit inuussutissarsiutigalugu nunalerisooq ukiumut agguaqatigiissillugit 250.000 kr.-inik annikinnerusunilluunniit isertitaqassaaq, aamma
- 2) qinnuteqartooq qinnuteqarnerup nalaanit ukiut pingasut sioqqullugit agguaqatigiissillugit 100.000 kr.-nit ikinnerusunik pisuussuseqassaaq

Isertitanut tunngaviusoq kinaassusersiunngitsumik nalilersuinissamut tunngaviuvoq, imatut paasillugu, qinnuteqarnerup nalaanit ukiut pingasut sioqqullugit ingerlataqartooq ukiumut agguaqatigiissillugit 250.000 kr.-it sinnerlugit isertitaqartooq sillimmasiisimanngikkuni § 1-imi pisunut allassimasunut aallarteqqinnissamut tapisiaqartinneqarsinnaanngitsoq.

Taamaattumik aalajangersakkami aallaavigineqartooq tassaavoq qinnuteqartooq ukiumut 250.000 kr.-inik ikinnerusunilluunniit isertitaqarsimappat tapiissutisisinnaasoq. Ukiumut isertitat akileraarutigut paasissutissatigut uppersarneqarsinnaapput. Qinnuteqarnerup nalaanit ukiut siuliini qinnuteqartup ukiumoortumik naatsorsuutai pingasut atorlugit pisuussutsimut piumasaaqat naammassisimallugu uppersarneqarsinnaavoq.

Nr. 3-mut (§ 3)

### § 3-mut

Imm. 1-imut.

Aallarteqqinnissamut tapiiffigineqarnissaaq pillugu qinnuteqaat imm. 2-mi suleriaatsit aalajangersarneqarsimasooq malillugu naalakkersuisoqarfimmuut akisussaasumut nassiunneqassaaq.

Imm. 2-mut.

Inatsimmi piumasaaqatit tunuliaqutaralugit illersorneqarsinnaasumik sullissinissamut piumasaaqatinik naammassinnittumik qinnuteqarnermi immersugassamik Naalakkersuisut suliaqassapput. Qinnuteqaateqarnermut immersugassami tassani piumasarineqassaaq pissutsit pisariaqartut tamarmik ilisimatitsissutigineqarnissaat. Aammattaaq missingersuutitigut assigisaatigulluunniit tapiissutit Inatsisartut inatsisaata siunertaanik naammassinninnerata ilimanarnera pillugu piumasaaqateqartariaqarluni. Qinnuteqaateqarnermi immersugassaaq suliat suliarineqarnerannut naleqqussartuarneqarsinnaavoq.

§ 1, imm. 2-mi eqqaaneqartunut pissutsinut qinnuteqaatit immikkut suliarisarnissaannut aalajangersaasoqarsinnaavoq.

§ 5 naapertorlugu atorsinnaanissamut piumasaanngilaq innuttaasup utertillugit akileeqqusaasinnaanermik ilisimatinneqarnissaa. Taamaattorli aqutsinermili pissuserissaarnerup ilagaa utertillugit akileeqqusaasinnaanerup nalunaarutigineqarsinnaanera.

Qinnuteqaateqarnermi immersugassaq § 3, imm. 2-mi taaneqartoq aqputigalugu tamanna pisinnaavoq.

Allanguutit pillugit ilisimatitsinissamut pisussaaffik, tak. § 5, imm. 2, oqaaseqatigiit aappaat, qinnuteqaateqartumut ilisimatitsissutigineqartariaqarpoq. Tamanna pisinnaavoq qinnuteqaateqarnermi immersugassaq aqputigalugu.

Ajoqusernermut tammartunulluunniit aallarteqqinnissamut tapiiffigineqarnissaq pillugu qinnuteqaatip, tak. § 1, imm. 1, nr. 1-2, pisup kingorna kingusinnerpaamik qaammat ataaseq qaangiutsinnagu nassiunneqarnissaa pillugu piumasaqaat inatsimmi eqqunneqarpoq.

Tamatuma kingunerisaanik piffissaliussaq qaangerneqarsimappat qinnuteqartoq aallarteqqinnissamut tapiissutisisinnaassanngilaq. Inuit inuussutissarsiornermut tunngasunik atortunik annaasaqartut imaluunniit atortunik annikitsumik ajoqusersimasut sukkanerpaamik inuussutissarsiummut uteqqinnissaat qulakkeerniarlugu piffissaliussaq eqqunneqarpoq peqatigisaanillu inuit pisinnaatitaanngitsut inuussutissarsiummut attuumassuteqanngitsunik tapiissutisisinnaannginnerat qulakkeerneqarluni.

Imm. 3-mut

Aallarteqqinnissamut tapiiffigineqarnissaq pillugu qinnuteqaa suliap suliarineranut attuumassuteqartunik paasissutissanik taakkununngalu uppernarsaatnik ilaqassaaq. Paasissutissat taakkua ass. tassaasinnaapput atortumut tammaasamut uppernarsaat soorlu politiinut, Kalaallit Nunaanni Aalisarsinnaanermut Akuersissutinik Nakkutilliisoqarfimmuut nalunaarutiginnissimaneq. Tassaasinnaavoq napparsimanermut uppernarsaat nakorsamit nalunaarut allaluunniit.

Uppernarsaatip qanoq iluseqarnissaa pingaaruteqanngilaq, pingaaruteqartorli tassaavoq uppernarsaatip piviusumik pisimasunik naammattumik erseqqissaanera uppernarsaaneralu.

Imm. 4-mut.

Soqutigisaqatigiit kattuffiata susassaqartup tusarniaaffigineqarnissaanut siunertaavoq qinnuteqaatit suliarineqarneranni suliassamut tunngasutigut siunnersorneqarnissaq, aqutsisut pisariaqartissimappassuk. Tusarniaaneq allaffitsigut aqutsisunit pissarsiariniarnera ajornakusoorluinnaraluarpalluunniit tapiissuteqartoqarsinnaavoq. Siunnersuummi § 1, imm. 2-mi allassimasut pineqartillugit soqutigisaqatigiit tusaaneqassapput. KNAPK aamma QAK maannakkut tassaapput inuussutissarsiuutigalugu aalisartunut inuussutissarsiuutigalugulu piniartunut soqutigisaqatigiiffittut kattuffiit. SPS nunalerisunut soqutigisaqatigiiffittut kattuffiuvoq.

Taakkunangga tusarniaanermut akissutit pisussaaffiliisuunngillat, tassa tusarniaanermut akissut allaffitsigut aqutsisunut inatsisitigut pituttuisuunngilaq.

Nr. 4-mut (§ 3 a)

§ 3 a-mut

Imm. 1-imut

Qinnuteqaammik aalajangersimasumik naliliineq tunuliaqutaralugu aallarteqqinnissamut tapiissuteqartoqassaaq. Tamatuma saniatigut aallarteqqinnissamut aningaasartuutit akilernissaannut qinnuteqartoq naammattumik aningaasaqarnikkut piginnaasaqartutut nalilerneqarpat aallarteqqinnissamut tapiiffigineqarnissaq pillugu qinnuteqaatip sularinissaanut itigartinnissaanullu aalajangersakkakut Naalakkersuisunut periarfissiivoq.

Imm. 2-mut

Qinnuteqartoq siusinnerusukkut atortut aserornerinut imaluunniit atortut annaenerinut aallarteqqinnissamut tapiissutisisimasoq tapiissutisinermit ukiut pingasut kingorna siusinnerpaamik tapiissutisisinnaavoq.

Qinnuteqartoq assersuutigalugu 2025-mi nipisanniarnermi qassutit annaenerinut aallarteqqinnissamut tapiissutisisimappat qinnuteqartoq taanna nipisanniarnermi qassutinut annaasanut siusinnerpaamik 2028-mi tapiissutisisinnaavoq.

Inatsimmi § 1, imm. 1, nr. 1-2 malillugu atortut ajoqusernerinut atortullu annaenerinut aalajangersagaq taamaallaat atorneqassaaq.

Nr. 5 – 4-imut

§ 4-mut

Imm. 1-imut

Aalajangersakkami siunertaq tassaavoq inuussutissarsiutip ingerlanneranut pisariaqarluinnartumik pisoqartillugu tapiissutit tunniunneqartarnissaat. Taamaattumik annaasanut tapiiffigeqqusanut tapiissutissat minnerpaaffilerneqarsimapput. Tapiissutissat annerpaaffilerlugit aalajangersaaneq ikkunneqarpoq tapiissutit innuttaasunut sapinngisamik amerlasuunut iluaqutaaniassammata. Tapiissutit qinnuteqarnerup kingorna tapiissutigineqassapput, tamatumalu kingunerisaanik qinnuteqaammik nassiussisimangitsunut ingerlataqartunut tapiissuteqartoqarsinnaanani.

Aalajangersakkami aningaasanik 2.000 kr.-niit 50.000 kr.-t tikillugit tunniussisoqarnissaanut periarfissiisoqarpoq. Taamaalilluni imaangilaq rekvisitionikkut aallarteqqinnissamut tapiissutinik qinnuteqartoq 50.000 kr.-nik pissarsissasoq, taakkuli tikillugit pissarsisinnaalluni.

Oqaatigisami "anigaasaliissutaasut iluanni" paasineqassaaq aallarteqqinnissamut tapiissutisinnissamut tunngavissanik anigaasanut inatsimmi kontomi anigaasanik naammattunik peqartariaqartoq aallarteqqinnissamut tapiissutininik tunniussisoqassappat. Taamaalilluni anigaasartuutininut matussutissanik anigaasanut inatsimmi anigaasanik naammattunik peqanngippat aallarteqqinnissamut tapiissutininik qinnuteqaatinut itigartinnissaannut tunngavissiisoqarpoq.

Imm. 2-mut

Aalajangersakkami siunertaavoq inatsisip siunertaanut tunngatillugu tapiissutit tunniunneqartut pitsaanerpaamik iluaqutigineqarnissaata qulakkeernissaa. Tassalu nassuiaatikkut qulakkeerneqassaaq tapiissutit siunertanut atorineqarnerat.

Tapiissutininik tunniussinermi erseqqissarneqassaaq nassuiaammut suut piumasarineqarnerat. Naalakkersuisut taakkununnga piunasaqaatit aamma nassuiaatit tunniunneqarnissaannut piffissarititaasut aalajangersassavaat. Nalunaartartussaataanerup malinneqarnissaa qulakkeerumallugu Naalakkersuisut ilaatigut aalajangersinnaavaat, nalunaartartussaataaneq eqqortinneqarsimanngippat, § 5, imm. 1, nr. 2 naapertorlugu nalunaartussaataaneq malinneqanngippat kingumut akiliisoqassasoq.

Nr. 6-imut

Inatsimmi tamarmi "Landsstyre" allanngortinneqassaaq imatut: "Naalakkersuisut".

## § 2

Inatsisartut inatsisaat ulloq 1. januar 2025-mi atuutilerpoq.

<b>Siunnersuut inatsimmut atuuttumut sanilliullugu</b>	
<i>Oqaasertaliunneqartut atuuttut</i>	<i>Siunnersuut</i>
	<p><b>§ 1</b></p> <p>Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffigineqartarnerat pillugu inatsisartut inatsisaat nr. 3, 21.maj 2004-meersumi imatut allannguisoqarpoq:</p>
<p><b>§ 1.</b>Inuussutissarsiutigalugu aalisartunut, inuussutissarsiutigalugu piniartunut inuussutissarsiutigalugulu nunalerinermik ingerlataqartunut pigisat ajoquserneratigut, inuussutissarsiornermi sakkugisat tammarnesisigut imaluunniit napparsimanikkut imaluunniit allatut timikkut ajoquserluni sulisinnaajunnaarnikkut inuussutissarsiutiminnut tunngatillugu annaasaqarsimasunut Naalakkersuisut aallarteqqinnissamut tapiissuteqarsinnaapput.</p> <p><i>Imm. 2.</i> Tamatuma saniatigut silamik pissuteqartumik ajornartorsiuteqarneq, nalinginnaasumik inuussutissarsiornikkut aporfeqarnerit assigisaaluunniit pissutigalugit annaasaqarnermut imm. 1-imi inunnut taaneqartunut immikkut ittumik pisuni aallarteqqinnissamut Naalakkersuisut tapiissuteqarsinnaapput.</p>	<p><b>1.</b> § 1 imatut oqaasertalerneqarpoq: ” <b>§ 1.</b> Inuussutissarsiutigalugu aalisartunut, inuussutissarsiutigalugu piniartunut inuussutissarsiutigalugulu nunalerinermik ingerlataqartunut pigisat ajoqusernerisigut imaluunniit ukuninnga peqquteqartumik inuussutissarsiutiminnut tunngatillugu annaasaqarsimasunut Naalakkersuisut aallarteqqinnissamut tapiissuteqarsinnaapput: 1) atortut ajoquserneri uppersarsarneqarsimappata, 2) inuussutissarsiummut tunngasut atortut tammarsimappata, 3) uppersarsarneqarsinnaasumik ilungersunartumik napparsimasoqarpat allatigulluunniit ajoqusernermik kinguneqartumik timi atorlugu sulisinnaajunnaartoqarsimappat imaluunniit ingerlataqartup inuussutissarsiutaanut atassuteqartuni atortut aserorsimappata, imaluunniit 4) inuussutissarsiornikkut</p>

	<p>nalinginnaasumik assigisaanilluunniit akornusertoqarsimappat.</p> <p><i>Imm. 2.</i> Silap pissusaata allanngorneranik allatigulluunniit ajunaarnersuarmik pisoqarneranik peqquteqartumik inuussutissarsiornikkut isertitat tamakkiisut imaluunniit annertuut sivikitsumik ilimasaarneqarnikkut annaaneqarpata imm. 1, nr. 1-4-imi taaneqartut saniatigut imm. 1-imi taaneqartunut inunnut aningaasatigut Naalackersuisut ikiuussinnaapput.</p> <p><i>Imm. 3.</i> Imm. 1-2-mi pisunut uppersaanissaq pillugu Naalackersuisut sukumiinerusumik malittarisassaliorsinnaapput."</p>
<p>§ 2 Aallarteqqinnissamut tapiissutit ajoquserneq, annaasaqarneq, napparsimaneq imaluunniit sulisinnaajunnaarneq matussuserneqarsinnaasimanngippata imaluunniit nammineerluni sillimassutitigut pisortalluunniit sillimasiinerisigut imaluunniit nammineerluni pisortalluunniit tapiissutigisartagaasigut assigisaasigulluunniit matussuserneqarsinnaanngippata tunniunneqarsinnaapput.</p>	<p>2. § 2 imatut oqaasertalerneqassaaq: " § 2. Aallarteqqinnissamut tapiissutit tunniunneqarnissaannut piumasarineqarsinnaavoq § 1-imi ilaasut pisut matussuserneqarsimassanngitsut imaluunniit nammineerluni pisortalluunniit sillimasiinerinit matussuserneqarsinnaanngitsut.</p> <p><i>Imm. 2.</i> Ingerlataqartoq ukiup siuliani 250.000 kr.-inik annikinnerusunilluunniit ukiumut isertitaqarsimappat, peqatigisaanillu ajoqusernissaq sioqqullugu nammineq sillimasiinissamut qinnuteqartoq pisariaqartunik nammineq aningaasaateqarsimanngitsaq naliliisoqarluni imm. 1-imik Naalackersuisut saneqqussisinnaapput aallarteqqinnissamullu tapiissuteqarlutik."</p>
<p>§ 3. Aallarteqqinnissamut tapiissutinik qinnuteqaat Naalackersuisunut tunniunneqassaaq.</p> <p><i>Imm. 2.</i> Imm. 1 malillugu qinnuteqaateqarneq pissaaq Naalackersuisunit suliarineqarsimasoq qinnuteqaateqarnermut immersugassaaq</p>	<p>3. § 3 imatut oqaasertalerneqarpoq: " § 3. Aallarteqqinnissamut tapiissutinik qinnuteqaat Naalackersuisunut tunniunneqassaaq.</p> <p><i>Imm. 2.</i> Imm. 1 malillugu qinnuteqaat ajoqusernerup imaluunniit tammannerit pineranniit kingusinnerpaamik ullut 30-it</p>

<p>atorlugu.</p> <p><i>Imm. 3.</i> Imm. 1 malillugu qinnuteqaammut ilanngunneqassapput qinnuteqaateqartup aningaasatigut inissisimaneranut uppernarsaatit kiisalu inuussutissarsiornermut atasumik pigisat ajoqusernerannut, annaasaqarnermut, napparsimanermit allatulluunniit timikkut ajoqusernikkut sulisinnaajunnaarnermut uppernarsaatit.</p> <p><i>Imm. 4.</i> Aallarteqqinnissamut tapiissutit tunniunneqartassapput sapinngisamik soqutigisaqaqatigiit kattuffiat susassaartoq tusarniaavigereerlugu. Pissutsini § 1, imm. 2-mi aamma § 4, imm. 2-mi taaneqartuni soqutigisaqaqatigiit kattuffiat tusarniaavigineqartassaaq.</p>	<p>kingorna, Naalackersuisunit suliarineqarsimasoq qinnuteqaateqarnermut immersugassaaq atorlugu, tunniunneqassaaq , tak. § 1, imm. 1, nr, 1-2.</p> <p><i>Imm. 3.</i> Imm. 1 malillugu qinnuteqaammut qinnuteqartup aningaasaqarnikkut inissisimaffia pillugu uppernarsaat kiisalu inuussutissarsiornermut attuumasumik annaasaqarnek pillugu uppernarsaat ilaatinneqassaaq, takuuk § 1.</p> <p><i>Imm. 4.</i> Aallarteqqinnissamut tapiissutit sapinngisamik soqutigisaqaqatigiit kattuffiat susassaartoq tusarniaavigereerlugu tunniunneqartassapput. § 1, imm. 1, nr. 4, § 1 imm. 2-mi pisuni taaneqartuni soqutigisaqaqatigiit kattuffiat tusarniaavigineqartassaaq."</p>
	<p><b>4.</b> § 3 kingorna ikkunneqarpoq:  <b>” § 3 a.</b> Aallarteqqinnissamut tapiissutit qinnuteqaammik aalajangersimasumik naliliineq tunuliaqutaralugu tunniunneqartassapput, tassunga ilanngullugu aallarteqqinnissamut aningaasartuutit akilernissaannut qinnuteqartoq nammineq naammattunik aningaasaateqarnersoq.</p> <p><i>Imm. 2.</i> Ajoqusernerit tammartullu uteqqinneqartut eqqarsaatigalugit, tak. § 1, imm. 1, nr. 1-2, tunniussinermit siusinnerpaamik ukiut pingasut qaangiunneranni aallarteqqinnissamut tapiiffigineqarnissaaq pillugu qinnuteqartoqarsinnaavoq."</p>
<p><b>§ 4.</b> Aallarteqqinnissamut tapiissutit minnerpaamik 2.000 kr. annerpaamillu 25.000 kr. ataasiaannarluni tunniunneqartarput. 2.000 kr.-t amerlanerpaamillu 25.000.</p> <p><i>Imm. 2</i> Pissutsini immikkut ittuni Naalackersuisut imm. 1-imi taaneqartunit</p>	<p><b>5.</b> § 4, ima oqaasertalerneqarpoq:  <b>“ § 4.</b> Aallarteqqinnissamut tapiissutit ikinnerpaamik 2.000 kr.-inik qaffasinnerpaamillu 50.000 kr.-inik ataasiarluni akiliutigineqarsinnaapput, taamaattorli tak. imm. 3. Aningaasanut inatsimmi aningaasaliissutigineqartut</p>



<p>aningaasanik amerlanerusunik tunniussisinnaapput.</p> <p><i>Imm. 3.</i> Naalakkersuisut aallarteqqinnissamut tapiissutit tunniunneqarnerannut piumasarisinnaavaat tapiissutit qanoq atorneqarnerat pillugu kingornatigut qinnuteqaateqartoq nassuiaateqassasoq.</p>	<p>iluanni aallarteqqinnissamut tapiissutisisoqarnissaanut taamaallaat aalajangiisoqarsinnaavoq.</p> <p><i>Imm. 2.</i> Naalakkersuisut aallarteqqinnissamut tapiissutit tunniunneqarnerannut piumasarisinnaavaat tapiissutit qanoq atorneqarnerat pillugu kingornatigut qinnuteqaateqartoq nassuiaateqassasoq."</p> <p><i>Imm. 3.</i> Naalakkersuisut aallarteqqinnissamut tapiissutit tunniunneqarnerannut piumasarisinnaavaat tapiissutit qanoq atorneqarnerat pillugu kingornatigut qinnuteqaateqartoq nassuiaateqassasoq."</p>
	<p><b>6.</b> Inatsimmi tamarmi "Landsstyre" imatut allanngortinneqassaaq: "Naalakkersuisut".</p>
	<p style="text-align: center;"><b>§ 2</b></p> <p>Inatsisartut inatsisaat 1. januar 2025-mi atuutilissaaq.</p>

**Tusarniaanermut akissutit pillugit allakkiaq**

Siunnersuut Naalakkersuisut tusarniaanermi nittartagaanni piffissami 6. juni 2024-mit 5. juli 2024 ilanngullugu tamanut saqqummiunneqarnikuvoq, soorluttaa siunnersuut piffissami tassani tusarniutigineqarsimavoq ukununnga tulliuttutut allanneqartunut:

- Kalaallit Nunaanni Sulisitsisut
- SIK
- KNAPK
- SQAPK
- NUSUKA
- QAK
- Aalisarnermut siunnersuisoqatigiit ilaasortaalu
- Grønlandsbanken
- Bank Nordik
- Pinngortitaleriffik
- Royal Greenland
- Kommuneqarfik Sermersooq
- Kommune Qeqertalik
- Kommune Kujalleq
- Qeqqata Kommunia
- Avannaata Kommunia

Tusarniaanermi piffissaliussap naanerata kingorna tusarniaanermi akissutinik tusarniaaffigineqartunit tallimaniit Naalakkersuisut tigusaqarsimapput, ataani allassimasunik oqaaseqaateqarfigineqartut. Tassunga atatillugu oqaatigineqassaaq tusarniaanermi akissutit taamaallaat pingaaruteqarneranik naliliineq tunuliaqutaralugu pingaarnersiorlugit issuarneqarmata. Tusarniaanermi akissutinut Naalakkersuisoqarfiup oqaaseqaatai uingasumik allanneqarput.

## **1. Avannaata Kommunia (AK)**

AK ilisimatitsivoq piffissap ukiut pingasut iluanni ajoqusernerup assinganut ataatsimut tapiissutininik qinnuteqarnissaq periarfissaasariaqartoq. AK-mit aamma oqaatigineqarpoq 50.000 kr.-inik qaffaaneq pitsaasoq, kisiannili aalisarnermi piniarnermilu atortut akii sakkortuumik qaffassimmammata, pisariaqartutigut tulluarsaasoqartariaqartoq.

*Ajoqusernernerut assigiinnut tapiissuteqaqqinnissamut qummut killiliusseq siunnersuummi eqqunneqarpoq. Tamanna ilaatigut eqqunneqarpoq tapiissutisinissamut aaqqissuussinerit pillugit malittarisassanik aaqqissugaasumik avaqqutaarisarnerit pinngitsoortinniarlugit. Suliniummut pissutaavoq ilaatigut uppernarsaruminaatsunik qassutit tammarneri pillugit aallarteqaqqinnissamut tapiissutit pillugit qinnuteqaatinik assigiinnik ukiuni arlalinni tiguisoqartarsimammata. Naalakkersuisut isumaqarput aallarteqaqqinnissamut tapiissutit siumut sammisumik qulakkeernissaanut suliniut pisariaqartuusoq AK-llu tusarniaanermi akissutaa tunuliaqutaralugu siunnersuummi allannguisoqarnani.*

## **2. Kalaallit Nunaanni Sulisitsisut (GE)**

Siunnersuummut § 1, imm. 1, nr. 2-mut atortut tammarnerinut uppernarsaanissamut piunasaqaatip erseqqissarneqarnissaa GE-mit kissaatigineqarpoq.

*Naalakkersuisut aalajangersakkamut imatut allannguut ilannguppaat "2) inuussutissarsiummut tunngasut atortut tammarsimappata". Allannguinermi taamaalilluni erseqqissarneqarpoq aallarteqaqqinnissamut tapiissutit suulluunniit annaasat uppernarsarneqarsimasat tunuliaqutaralugit pissasoq. Aalajangersakkamut nassuiaatini uppernarsaanissamut piunasaqaammut assersuutit arlallit erseqqissaatigineqarput.*

Siunnersuummut § 1, imm. 1, nr. 3-mut GE-mit siunnersuutigineqarpoq aalajangersagaq atorunnaassasoq.

*Matumuuna aalajangersagaq naapertorlugu iluarsineqarpoq.*

Siunnersuummut § 2, imm. 1-imut ajoqusernerit sillimmaserneqarsinnaanngitsunut assigiinngitsunut assersuuteqarnissaq GE-mit kissaatigineqarpoq.

*Aalajangersakkami oqaaseqaatit tassunga naapertuuttunngorlugit allanngortinneqarput.*

Siunnersuummut nalinginnaasumik nassuiaatini immikkoortoq 2.1, immikkoortut pingajuanni kinaassusersiunngitsumik naliliinissamut tunngaviup erseqqissarneqarnissaa GE-mit kissaatigineqarpoq.

*Siunnersuummi § 2, imm. 2-mi 250.000 kr.-inut appasinnerusunulluunniit aningaasat killilernerqarneri ikkunneqarpoq. Tamanna isumaqarpoq ingerlataqartoq ukiumut 250.000 kr.-inik taakkuluunniit inorlugit ukiumut isertitaqartoq aallarteqqinnissamut tapiissutisinissamut eqqarsaatigineqarsinnaasoq, taanna sillimasiisimanngikkaluarpalluunniit. Tamatumali assigiinnanngilaa pineqartup piviusumik aallarteqqinnissamut tapiissutinik pissarsinissaa. Nalilersueqqissaarneq sulitunngavigineqassaaq.*

Siunnersuummut § 4, imm. 4-mut GE-mit oqaatigineqarpoq 50.000 kr.-it sinnerlugit tapiissutisinissamut piumasaqaatit erseqqissuullutillu kinaassusersiortuussanngitsut.

*Tusarniaanerup kingorna 50.000 kr.-init amerlanerusunik tapiissuteqartarnissaaq siunnersuummit peerneqarpoq.*

### **3. KNAPK**

KNAPK siunnersuummut § 1, nr. 4-mut siunnersuutigaa paatsuinerit pinngitsoorniarlugit aalajangersagaq allamik oqaasertalernerqassasoq.

*Siunnersuut tamanna naapertorlugu allanngortinneqarpoq.*

Siunnersuummut § 3, imm. 2-mut KNAPK-mit oqaatigineqarpoq inunmut tamaviaarnartumik napparsimasunut imaluunniit ajunaarnersuarnut eqqaanartunut pissutsinut ullunik 30-nik piffissaliineq ullunik 30-nik piffissaliussamit eqqorneqarsinnaasut.

*Oqaatigineqarpoq qinnuteqarnissamut ulluni 30-ni piffissaliinissaaq pillugu piumasaqaat inatsimmi § 1, imm. 1, nr. 1-2-mi eqqaaneqartunut taamaallaat atuuttoq, tamatumalu kingunerisaanik napparsimaneq ajunaarnersuarmullu eqqaanartut pisut qinnuteqarnissamut piffissamut ilaatinneqarnatik.*

### **4. QAK**

Siunnersuummi § 3, imm. 4-ramut oqaaseqaatigineqartunut ilaanissaaq QAK-mit kissaatigineqarpoq.

*Nassuiaatit tamanna naapertorlugu allanngortinneqarput.*

Tamatuma saniatigut QAK-mit oqaatigineqarpoq aallarteqqinnissamut tapiissutit pillugit qinnuteqaatit killilernissaannut Naalakkersuisut mianersussasut. QAK isumaqarpoq qinnuteqarnissamut inatsisitigut aalajangersarneqartumik piffissaliussamik aalajangersaanikkut "siunniussaannngitsunik" qinnuteqartarnerpassuit pilersinneqarsinnaasut. Kattuffiup siunnersuutigaa qinnuteqaatit ataasiakkaarlugit naliliiffigineqartarnissaat, qinnuteqartup qinnuteqaammunik assilissatigut uppersaanikkut tunngavilersuisinnaanera pillugu malittarisassat eqqunneqarlutik.

*Immikkoortoq 1, Avannaata Kommuniata akissutaanut innersuussisoqarpoq.*

## **5. Kommuneqarfik Sermersooq (KS)**

Aallarteqqinnissamut tapiissutit 50.000 kr.-iniit 75.000 kr.-inut qaffannissaat KS-imit kissaatigineqarpoq. Inuussutissarsiutigalugu piniartut aningaaserivimmi taarsigassarsinissamut periarfissaqanngimmata taakkulu tunitsivissatut periarfissaat killeqartorujussuummata, soorlu aamma nappaammik eqqorneqarunik imaluunniit motoriiarunik nunagisaminnilu iluarsaassisoqarnissaanut iluamik periarfissaqaratik, tamannalu sulii qaavatigut unammillernartitsilluni.

*Kommunip oqaaseqaatai naapertorlugit siunnersuummi Naalakkersuisut allannguinnillat.*